



An Bhruiséal, 20 Aibreán 2023
(OR. en)

Comhad Idirinstiúideach:
2021/0211/B(COD)

8361/23
ADD 1

CODEC 625
CLIMA 202
ENV 385
ENER 193
TRANS 149
COMPET 340
ECOFIN 351

NÓTA MAIDIR LE MÍR "A"

ó:	Ardrúnaíocht na Comhairle
chuig:	An Chomhairle
Ábhar:	Dréacht-RIALACHÁN Ó PHARLAIMINT NA hEORPA AGUS ÓN gCOMHAIRLE lena leasaítear Rialachán (AE) 2015/757 chun foráil a dhéanamh do chuimsiú gníomhaíochtaí loingseoireachta muirí i gCóras Trádála Astaíochtaí an Aontais agus chun faireachán, tuairisciú agus fóró a dhéanamh ar astaíochtaí gás ceaptha teasa breise agus ar astaíochtaí ó chineálacha breise long (an chéad léamh) – Glacadh an ghnímh reachtaigh = Ráitis

Ráitis ón gCoimisiún

Ráiteas 1

Chun feabhas breise a chur ar shláine agus trédhearcacht mhargadh carbóin na hEorpa, tabharfaidh an Coimisiún athruithe isteach sna gníomhartha tarmligthe lena rialaítear ceantáil na lamháltas astaíochtaí agus feidhmiú Chlárann an Aontais, chun feabhas a chur ar an tuairisciú rialála agus ar an bhfaireachán margaidh i margadh na lamháltas astaíochtaí agus na ndíorthach díobh, chun cosc agus brath drochúsáide margaidh a chur chun cinn agus chun cuidiú le margaí ordúla a choinneáil ar bun le haghaidh lamháltas astaíochtaí agus díorthaigh ghaolmhara.

Le hAirteagal 36 de Rialachán (AE) Uimh. 1031/2010 ón gCoimisiún (an Rialachán Ceantála), cuirtear d'oibleagáid ar an ardán ceantála mionsonraí iomlána agus cruinne gach idirbhirt ceantála a thuairisciú dá n-údarás náisiúnta inniúil, údarás arna ainmniú faoi Threoir 2014/65/AE (MiFID 2). San athbhreithniú atá ar na bacáin ar an Rialachán Ceantála, déanfaidh an Coimisiún foráil maidir le sonraí faoi cheantanna a bheidh le tuairisciú freisin go díreach don Údarás Eorpach um Urrúis agus Margaí (ESMA). Leis sin, cuirfear feabhas ar an bhfaireachán éifeachtúil ar cheantanna lamháltas astaíochtaí agus ar naisc ábhartha leis an margadh tánaisteach.

Le hAirteagal 55(4) de Rialachán (AE) 2019/1122 ón gCoimisiún (an Rialachán maidir le Clárlann); foráiltear nach mór idirbhearta thar an gcuntar, ar idirbhearta déthaobhacha iad amháin, a mharcáil nuair a chuirtear tús le haistriú lamháltas astaíochtaí i gClárlann an Aontais. Ní dhéanann rannpháirtithe sa mhargadh an mharcáil sin go córasach, áfach. Leasóidh an Coimisiún an ceanglas maidir le hidirbhearta thar an gcuntar, ar idirbhearta déthaobhacha iad amháin, a mharcáil chun sealbhóirí cuntais a chur ar an eolas ar bhealach níos fearr agus chun a áirithiú go gcuirfear an fhoráil sin chun feidhme ar bhealach níos fearr. Ina theannta sin, cuirfidh an Coimisiún coigeartuithe teicniúla chun feidhme i gcóras Chlárlann an Aontais chun go mbeidh an mharcáil sin ina ceanglas éigeantach chun idirbhearta a chur i gcrích.

Chun feabhas a chur ar cháilíocht na sonraí a bheidh ar fáil do rialtóirí margaidh i dtaca leis an margadh dá ngairtear spotmhargadh na lamháltas astaíochtaí, leasóidh an Coimisiún an Rialachán maidir le Clárlann le go mbeidh na rialtóirí margaidh in ann rochtain rialta a iarraidh ar shonraí ó Chlárlann an Aontais. Fágfaidh an méid sin go mbeidh rialtóirí in ann faisnéis thráthúil a fháil, ar faisnéis í a mbeifear in ann a chros-seiceáil le sonraí rialála a fhaightear faoi mhargaí na ndíorthach, agus idirghabháil a dhéanamh más iomchuí chun seasamh le feidhmiú cuí an mhargaidh carbóin Eorpaigh.

Ar deireadh, is mian leis an gCoimisiún a mheabhru go ndéantar lamháltais astaíochtaí a aicmiú mar ionstraimí airgeadais faoin Treoir maidir le Margaí in Ionstraimí Airgeadais (MiFID2), ó mhí Eanáir 2018 i leith. Roimhe sin, níor tháinig ach conarthaí díorthach na lamháltas astaíochtaí faoi raon feidhme rialacha an mhargaidh airgeadais. Go hiarbhír, leis an aicmiú sin, cruthaítear oibleagáidí atá thar a bheith sonrach le haghaidh eintitis a bhíonn ag trádáil sa mhargadh carbóin Eorpach.

I gcomhréir le hAirteagal 58 de Threoir 2014/65/AE (MiFID2), ní mór do na rannpháirtithe uile sa mhargadh líon na suíomhanna atá acu sa mhargadh carbóin a thuairisciú ar bhonn laethúil (tuairisciú ar shuíomhanna). Déantar na tuairiscí sin ar shuíomhanna a chur faoi bhráid na n-údarás inniúil náisiúnta agus foilsíonn ESMA ar bhonn seachtainiúil iad.

De réir Airteagal 26 de Rialachán (AE) Uimh. 600/2014, ní mór do rannpháirtithe sa mhargadh mionsonraí faoi na hidirbhearta airgeadais uile atá acu i lamháltais astaíochtaí agus i ndíorthaigh díobh, lena n-áirítear idirbhearta thar an gcuntar, a thuairisciú do na húdaráis inniúla (oibleagáid chun idirbhearta a thuairisciú). De réir Airteagal 16 de Rialachán (AE) Uimh. 596/2014 (an Rialachán maidir le Drochúsáid Mhargaidh), tá na rannpháirtithe uile sa mhargadh faoi réir rialacha dochta maidir le drochúsáid mhargaidh a chosc, lena n-áirítear oibleagáid dhlíthiúil chun fógra a thabhairt do na húdaráis airgeadais ábhartha faoi aon iompraíocht trádála amhrasach.

Ní mór do na rannpháirtithe sa mhargadh a n-idirbhearta i lamháltais agus i ndíorthaigh díobh a thuairisciú do na húdaráis inniúla náisiúnta ábhartha, údaráis atá freagrach as formhaoirseacht a dhéanamh ar an margadh carbóin. Ar an leibhéal Eorpach, is é ESMA a dhéanann comhordú ar a ngníomhaíochtaí, mar is amhlaidh i gcás ionstraimí airgeadais eile.

Ráiteas 2

Leis na hábhair thiomnaithe sa réimse muirí sna glaonna ar thograí dá dtagraítear in Airteagal 10a(8), ba cheart 20 milliún lamháltas a úsáid sna réimsí sin go dtí 2030, de réir na rialacha is infheidhme sna glaonna sin.

Ráiteas 3

Measann an Coimisiún, le hAirteagail 3d(4), 10(3) agus 30d(6) de Threoir 2003/87/CE, nach gcuirtear oibleagáid ar na Ballstáit aon chistí a chur i leataobh ar an leibhéal náisiúnta. Leis an Treoir sin, bunaítear foinse an ioncaim agus leagtar síos cuspóirí ginearálta atá le roghnú ag na Ballstáit chun an t-ioncam sin a úsáid.

Dearbhaíonn an Coimisiún nach gceanglaítear ar na Ballstáit na hioncaim ó cheantáil lamháltais CTA a chur in áirithe, ach go bhféadfaidh siad ‘coibhéis i luach airgeadais’ na n-ioncam sin a úsáid.